

VENDIM
Nr.541, datë 27.7.2011

**PËR DISA NDRYSHIME NË VENDIMIN NR.1114, DATË 30.7.2008 TË
KËSHILLIT TË MINISTRAVE "PËR DISA ÇËSHTJE NË ZBATIM TË
LIGJEVE NR.7703, DATË 11.5.1993 "PËR SIGURIMET SHOQËRORE NË
REPUBLIKËN E SHQIPËRISË", TË NDRYSHUAR, NR.9136, DATË 11.9.2003
"PËR MBLEDHJEN E KONTRIBUTEVE TË DETYRUESHME TË
SIGURIMEVE SHOQËRORE DHE SHËNDETËSORE NË REPUBLIKËN E
SHQIPËRISË", TË NDRYSHUAR, DHE NR.7870, DATË 13.10.1994 "PËR
SIGURIMET SHËNDETËSORE NË REPUBLIKËN E SHQIPËRISË", TË
NDRYSHUAR"**

Në mbështetje të nenit 100 të Kushtetutës, të ligjit nr.7703, datë 11.5.1993 "Për sigurimet shoqërore në Republikën e Shqipërisë", të ndryshuar, dhe të ligjit nr.7870, datë 13.10.1994 "Për sigurimet shëndetësore në Republikën e Shqipërisë", të ndryshuar, me propozimin e ministrit të Financave, Këshilli i Ministrave

VENDOSI:

Në vendimin nr.1114, datë 30.7.2008 të Këshillit të Ministrave, të ndryshuar, bëhen këto ndryshime dhe shtesa:

1. Pika 2 e kreut II, ndryshohet, si më poshtë vijon:
"2. Paga minimale mujore, për efekt të llogaritjes së kontributeve të sigurimeve, shoqërore e shëndetësore, nga data 1.7.2011 e në vazhdim, të jetë jo më pak se 17 540 (shtatëmbëdhjetë mijë e pesëqind e dyzet) lekë, ndërsa paga maksimale mujore të jetë 87 700 (tetëdhjetë e shtatë mijë e shtatëqind) lekë. Për të punësuarit, marrëdhëniet e punës të të cilëve rregullohen me ligjin nr.7961, datë 12.7.1995 "Kodi i punës në Republikën e Shqipërisë", të ndryshuar, paga minimale mujore për llogaritjen e kontributeve, është ajo e përcaktuar nga Këshilli i Ministrave, në zbatim të nenit nr.111 të ligjit të sipërpërmendur, e cila nuk mund të jetë më e ulët se paga minimale, e përcaktuar në paragrafin e parë të kësaj pike."

2. Pikat 1, 2, 6, 7, 9, 10, 11 e 13 të kreut III, ndryshohen, si më poshtë vijon:

"1. Shuma minimale mujore e kontributeve, për të gjitha degët e sigurimit, për periudhën nga data 1.7.2011 e në vazhdim, të jetë 4 894 (katër mijë e tetëqind e nëntëdhjetë e katër) lekë.

Kontributi minimal mujor, sipas degëve të sigurimit, të jetë:

në % në lekë

Dega e sigurimit të sëmundjeve 0.3 52;

Dega e sigurimit të barrë lindjeve 1.4 246;

Dega e sigurimit të pensioneve 21.6 3 790;

Dega e sigurimit të aksidenteve dhe

sëmundjeve profesionale 0.3 52;

Dega e sigurimit të papunësisë 0.9 158;

Sigurimet shëndetësore 3.4 596.

2. Shuma minimale mujore e kontributit të sigurimit shëndetësor për të vetëpunësuarin dhe për pjesëtarët e familjes, të patrajtuar me pagë, të jetë 7 për qind e pagës minimale mujore, e barabartë me 1 228 (një mijë e dyqind e njëzet e tetë) lekë.

6. I vetëpunësuar, i vetëpunësuar në ortakëri, i vetëpunësuar që punëson të tretë (me përjashtim të të vetëpunësuarit në bujqësi), duke filluar nga data 1.7.2011 e në vazhdim, paguan për vete një kontribut të detyrueshëm për sigurimet, shoqërore dhe shëndetësore, në masën 30 për qind (23 për qind sigurim shoqëror dhe 7 për qind sigurim shëndetësor) të pagës mujore minimale prej 17 540 (shtatëmbëdhjetë mijë e pesëqind e dyzet) lekësh, të barabartë me 5 262 (pesë mijë e dyqind e gjashtëdhjetë e dy) lekë në muaj.

7. I vetëpunësuar, për pjesëtarët e familjes së tij mbi 16 vjeç, që nuk trajtohen me pagë, por që punojnë e bashkëjetojnë me të ligjërisht (me përjashtim të të vetëpunësuarit në bujqësi), duke filluar nga data 1.7.2011 e në vazhdim, paguan kontribut të detyrueshëm për sigurimet, shoqërore dhe shëndetësore, në masën 30 për qind (23 për qind sigurim shoqëror dhe 7 për qind sigurim shëndetësor) të pagës mujore minimale prej 17 540 (shtatëmbëdhjetë mijë e pesëqind e dyzet) lekësh, të barabartë me 5 262 (pesë mijë e dyqind e gjashtëdhjetë e dy) lekë në muaj.

9. Personat e vetëpunësuar në veprimtari, tregtare apo shërbimi, ambulante, nga data 1.7.2011 e në vazhdim, të deklarojnë dhe të paguajnë kontribut minimal mujor në shumën 1 800 (një mijë e tetëqind) lekë.

10. Personat mbi 16 vjeç, me të ardhura të rregullta nga pronësia e që nuk janë të punësuar diku tjetër, duke filluar nga data 1.7.2011 e në vazhdim, të paguajnë kontribut vetëm për sigurimin shëndetësor, në masën 7 për qind të pagës mujore minimale, prej 17 540 (shtatëmbëdhjetë mijë e pesëqind e dyzet) lekësh.

11. Të vetëpunësuarit në bujqësi, nga data 1.7.2011 e në vazhdim, të derdhin kontribut vjetor, për sigurimet shoqërore, në masën 21 600 (njëzet e një mijë e gjashtëqind) lekë, me përjashtim të të vetëpunësuarve që banojnë në rrethet: Buiqizë, Dibër, Gramsh, Has, Kolonjë, Kukës, Librazhd, Malësi e Madhe, Mat, Mirditë, Pukë, Skrapar, Tepelenë dhe Tropojë, për të cilët masa e kontributit vjetor është 14 040 (katërmëdhjetë mijë e dyzet) lekë.

13. Kontributi i detyrueshëm për sigurimet shoqërore, për personat që punojnë si punëtorë shtëpie, nga data 1.7.2011 e në vazhdim, të jetë 1 800 (një mijë e tetëqind) lekë në muaj."

3. Pika 6 e kreut IV, ndryshohet, si më poshtë vijon: "6. Mbështetur në ligjin nr.10 418, datë 21.4.2011 "Për legalizimin e kapitalit dhe faljen e një pjese të borxhit ta timor e doganor", të vetëpunësuarit në bujqësi paguajnë kontributet për sigurimet shoqërore e shëndetësore, për vitin në vazhdim, pasi të kenë shlyer detyrimet e papaguara për sigurimet shoqërore, që nga data 1.1.2009. Të vetëpunësuarit në bujqësi, të cilët nuk arrijnë të plotësojnë kushtin minimal të vjetërsisë në punë, për të përfituar pension të pjesshëm sipas dispozitave të ligjit nr.7703, datë 11.5.1993 "Për sigurimet shoqërore në Republikën e Shqipërisë", të ndryshuar, mund të kryejnë pagesa kontributesh pas plotësimit të moshës për pension, por me kusht që ato t'u korrespondojnë periudhave para plotësimit të moshës për pension dhe të mos jetë caktuar ende asnjë lloj pensioni."

4. Kreu VIII ndryshohet, si më poshtë vijon:

"VIII. SHUMA BAZË E PËRFITIMEVE

1. Në mbështetje të neneve 2, 32, 36, e 48 të ligjit nr.7703, datë 11.5.1993 "Për sigurimet shoqërore në Republikën e Shqipërisë", të ndryshuar, shuma bazë e përfitimit, nga data 1.7.2011 e në vazhdim, të jetë 11 117 (njëmbëdhjetë mijë e njëqind e shtatëmbëdhjetë) lekë në muaj.

2. Në mbështetje të nenit 96 të ligjit nr.7703, datë 11.5.1993 "Për sigurimet shoqërore në Republikën e Shqipërisë", të ndryshuar, shuma e përfitimit, për personat, që nuk plotësojnë kushtet për përfitimin e masës së pensionit, të përcaktuar në paragrafin e parë të këtij neni, nga data 1.7.2011 e në vazhdim, të jetë 7 468 (shtatë mijë e katërqind e gjashtëdhjetë e tetë) lekë në muaj.

3. Në mbështetje të pikës 3 të nenit 27, të pikës 2 të nenit 59, dhe të nenit 60 të ligjit nr.7703, datë 11.5.1993 "Për sigurimet shoqërore në Republikën e Shqipërisë", të ndryshuar, baza e vlerësuar mujore për efekt të llogaritjes së të ardhurave për barrë lindje, për rastet kur e drejta e përfitimit ka lindur, por përfituesja nuk ka pagë gjatë gjithë muajve të vitit të fundit kalendarik, llogaritet duke bashkuar shumën e pagave faktike për muajt që është derdhur kontribut për sigurimet shoqërore, me shumën e pagave minimale të përcaktuara për efekt të derdhjes së kontributit të sigurimit shoqëror për muajt pa kontribut, pjesëtuar me 12 muaj.

4. Në mbështetje të pikës 4 të nenit 27 të ligjit nr.7703, datë 11.5.1993 "Për sigurimet shoqërore në Republikën e Shqipërisë", të ndryshuar, shuma bazë e përfitimit për gratë, të cilat e kanë periudhën e fundit të sigurimit si të vetëpunësuarat në bujqësi, nga data 1.7.2011 e në vazhdim, të jetë 7 468 (shtatë mijë e katërqind e gjashtëdhjetë e tetë) lekë në muaj."

Ky vendim hyn në fuqi pas botimit në Fletoren Zyrtare dhe i shtrin efektet nga data 1.7.2011.

KRYEMINISTRI
Sali Berisha